

信徵全集



信徵全集



何遜齋集



國福玖李
替於嗣后

序

嘗見世人以古隸篆籀之體與說文恠異不經見之字餽飭雜臻
成文貌爲高古雄奇以恐嚇村學小兒而冬烘先生亦往往所爲
驚駭至於眩目咋舌而不敢卒讀有識者閱之無文理無文情無
文法只如甘蔗棄渣何有意味而人或爭之曰其色澤可觀也不
知錦繡綺羅可謂色澤之極矣今於綢緞店中裁縫案底拾得剪
殘拋棄零碎細料補綴成文執以語人謂此衣五顏七色無綵不
備可與宮錦鬪麗藻火爭耀雖朝衣黼黻龍章八采亦不過是也
誰其取之轉不如青藍浚素之帛爲組織中之上品乃天下之人
所佩服也夫文章之道至左史立其極然試讀左傳史記中有一

字半句費人解索者乎其理其情其法皆平易通達與人以易知者也而天下後世糾縵英華之才極鋪張揚厲之作亦終無以加乎其上下六朝靡麗尋枝摘葉者無論如韓也柳也歐也蘇也非文章家所稱爲宗工大匠者哉至讀其文亦未嘗有一字半句費人解索之處然後嘆天下之至文皆天下之至情成之文生情情生文愈平淡愈雄奇愈通達愈高古吾讀錦谷先生信徵各集而知之矣集中所載其事甚奇甚恠甚異甚變其理至近至淺至平至常其文最明最顯最幽最雋其可以入吾之心而暢然以喜惕然以懼悄然以憂快然以樂宜亦可以入天下人之心而暢然以喜惕然以懼悄然以憂快然以樂者矣何也其可以勸人者皆是人

人心中固有之理其可以戒人者皆是人人心中後起之私固不必勸人而人自勸不必戒人而人自戒而人之未嘗勸戒者則以未覩此可勸可戒之事一觸其當勸當戒之心故心之寂然安然無所勸戒於平日也苟一旦而見此可勸者福隨念來可戒者禍不旋踵勸戒炯然不爽毫釐雖欲不勸而不覺自喜自樂矣雖欲不戒而不覺自懼自憂矣勸戒之鑑日懸於前勸戒之程聽趨於後此心勃焉笑焉汨焉鹿焉已於莫致或至莫知或爲而爲之一動且夫天下之人不肯爲善去惡者每由於心之不動耳動則能思思其善也眼前吃虧境過何如思其惡也眼前快意結局何如固不必執途人而一一勸之戒之也而不啻執途人一一勸之戒

之也而在途人雖欲不勸之戒之而不得矣而在途人必出於勸之戒之而心乃安也安於其心動之先心動之後也乎吾童年讀書不解疑問先嚴見錦谷好問因命與同學吾之交錦谷乃父命也今已四十餘年矣而情如一日所以厚吾者至矣錦谷匾所居曰我我書室問何意曰我爲我我不失爲我我自成其爲我又云人自暴自棄不知有我也若知有我則必自愛能自愛乃能愛人知有我身道德日新知無我身名利日輕始可由有我以學至於毋我然因此每爲同時所嫉爰改爲敬勝書屋錦谷常念一聯云雪逞風威白佔田原能幾日雲乘雨勢黑瞞天地不多時今著各集仍此意也乎吾讀同心之言集云有形無神不成畫有字無情

不成詩錦谷之詩畫如此則錦谷之文亦何莫不然耶惜也吾有屠龍之技而不能見用於世卽世人亦未有能知吾技者知之獨畢雨民與錦谷耳而二人又皆遠隔萬里之外獨唱無和獨絃哀歌茫茫四海其奈之何使他日得奏吾技於錦谷詩文之中同傳不朽不惟吾之大幸抑亦錦谷之深信也哉

同治二年春正月下浣同學愚弟黃政廉儉吾氏撰

玲瓏石齋文集序

乙丑七月余卸電白縣事回省住佛山問心樓中未曾聽鼓上衙
各相知書函疊至皆催頻見上憲易得優缺余復函云奔走趨承
乃可得缺信矣更能逢迎希旨乃可得美缺亦信矣此合時宜之
事所謂幹員能員余豈不欲隨時學習然生性迂拙恐學之亦不
成反將平日讀書面目失去則是欲求有得於我而已先失故我
矣况得美缺不過多有財耳夫財之多可以收古今玩好可以備
服食器用可以置良田華屋又可以通聲氣可以廣交納可以援
新例可以邀保薦可以謀優缺而獨有不可購者光陰似箭日月
如梭旦暮忽忽隙駒逼人雖欲延一刻寸晷而不可得也夫人生

壽至長不過百年耳縱使貴至一品富積百萬一生所享能幾何時所積愈多則子孫罪孽亦愈多思之爛熟轉不如得一瘠貧之區冷沒之地寢邱礪磈人無謀奪可以積善修身教民課子寬閒歲月著數卷書出以問世非務名也則將以平生蘊蓄不能買頭上青絲使百年而不雪者亦可以存囊中舊業使千載以常新是世人甚患其失者余自別有所得余所不求倖得者世俗惟恐其或失得失之間聽天安命以守余拙故於丙寅夏六月八日泣碣石水任署冷於菴人瘦似鶴清苦之地政刑俱簡乃得又著信徵增集共成上下二卷云

同治五年七月新秋後吏隱書於退幾步想之室

信徵增集卷上

滇南段永源錦谷著

目錄 共十四則

清芬

和氣

完人

義士

顛母

瞽兒

仙訓

檢文

俠僕

拾銀

虎字

鼃夢

善行

罔極

清芬

同學友畢而民與余十三歲相交自少至老未嘗有分毫芥蒂其
家四代爲宦科甲相聯而清貧無一住屋則祖父之教澤可謂超
越尋常萬萬矣蓋人之出仕必以構華屋營巨室買良田廣陂池
或子女玉帛器用服食求與園亭相稱者則盡力而爲之惟恐其
不足此卽偶得一官亦可以遂其所欲卽得一小官亦可以貽厥
孫謀矣又何至一枚老硯數卷殘書之外更無長物可以留爲子
孫衣食之計耶兩民告余云我先祖太守公號恥齋特授江西贛
州府知府在任數年所入清俸惟以濟人爲務江西多溺女之風
乃出資爲建育嬰堂收棄孩以養之至二歲後聽人抱養不禁又

贛州地瘠民貧遇水旱疾疫多十歲八歲無歸着之兒女則又建義房收四境之幼小者而養育之男則延師教以識字女則延婦教以紡績其後江西別府州縣亦有仿此而行之者太守公歷任各府皆懇懇爲之而不倦以故宦囊空虛解組時仍清貧如寒士家也嘗訓家中老幼云人生貧富命爲之也命中合有造化不能奪之爲無命中合無造化不能私之爲有不必妄想不容強求者也如吾之多年爲官今日不富非吾命中無富是吾積而能散留此餘財於造化爲後人多享幾代也否則仕宦中富至數十萬金轉瞬子孫滅絕祖墳無人拜掃者豈少也哉世上智巧者身無立錫愚拙者家有餘資通才者白首窮經寡學者青雲早步鑽求者

欲得反失安分者不謀自成人事之相反世道之不公不知者將
欲舉此以問天也而亦思此非才學智巧鑽求之不若人其不若
人者命耳不知命者非妄則愚疾馳而躓躁進而跌貪得而失求
富而貧不義而取禍非禮而招殃如蠅之赴湯如蛾之投火如獸
之入阱死且不顧實亦可哀吾教爾輩以知命之法曰造命修善
也曰惜命自愛也曰安命守分也如是則吾所以遺爾輩者雖數
代食之不盡矣何必多財始爲富耶只望後人富於心不富於身
富於學不富於家富於民不富於位吾所以恥名齋者平生之志
如此及我先嚴號均谷遵祖之訓自鄉薦後會試一次卽以養親
教子爲志不復有仕宦之心舌耕硯田所入無幾蔬食布衣怡然